

260191
941

施州考古錄

甲子夏月友世字清返名
沙尾吟以遺此冊致有觀
有勉味七月廿一日君具
記甲子夏月

字清

施州考古錄

施州考古錄序

余與渭川皆爲貧而仕者也不宜遠宦施南又皆上有老親欲謀升斗或以迎養者也尤不宜遠宦施南丙辰七月渭川奉省吏檄權恩施縣事余竊竊然疑之送其行憐其遠也乃時閱一年丁巳九月省吏又檄余承乏斯邑更心焉訝之豈余與渭川均有緣於施南耶抑施南之遐荒邈遠必不可無余與渭川兩人之蹟耶余去歲在省通志局曾借恩施縣志而披閱之其形勢內載東臨荆湖西抵巴蜀近瞰巫峽遠控夜郎距省一千九百八十七里可謂遠矣仲冬之月余到施城至署見渭川卽贈我恩施縣志一部蓋署中舊有板片年久散軼渭川於少者增之缺者補之迺成完書適內部徵取各縣縣志遂印刷多部分惠同人惟原書導源於施州衛舊志所載沿革故實多形漏略且前後抑復參互擬爲續修之舉因於公餘之暇援據古籍附以獨見凡得四十餘目成施州考古錄二卷余受而讀之如施州形勢一條內稱地理志於形勢下載云外蔽夔峽內遠溪山自巴蜀而瞰荆楚者恆以此爲出奇之道此語本出顧氏而尙未得其主旨茲引讀史方輿紀要以詳補之又施爲古夜郎地一

施州考古錄

序

一

條內稱藝文志載明李一鳳作夜郎辨清李宗汾陳詩羅德崑並有施非夜郎考與辨且有漢夜郎唐夜郎之聚訟茲引唐置珍州乾德四年蠻酋珍州刺史田景遷內附納土以西江爲界自是西江以北夜郎縣故地盡入施州以施爲古夜郎之確證其識解過人遠矣餘皆精心搜討引證詳明昔人謂考據之作不可一字無來歷茲錄之可以信今傳後無疑也或者謂渭川以浙省名元篤志好學湖山擷秀箸述等身固不待以施南顯就令在恩施言之年餘以來百廢俱舉勞心焦慮歌頌弗諠亦不待以斯錄著而余猥不能已於言者渭川爲貧而仕且欲稍博斗升爲養親計乃交篆後身無長物僅存此施州考古錄二卷載之歸裝留以博高堂之一笑顧以余之不才步渭川後其不逮也審矣乃不惟不能博斗升之奉而並不能援斯錄以續修縣志其慚歎又孰甚焉此吾所以益重渭川而深以自勵者歟戊午夏五月古雩婁如小兄吳良綦拜序

施州考古錄後序

古所稱親民之吏者非直聽訟催科程效於簿書期會之間而已於其地之山川民物風俗紀載尤必博考周諮勲勲焉若記其家珍而治其譜牒思所以推暨而流傳之蓋視乎傳舍其官吏所治於路人者宅心厚薄不可以同日語也衢州鄭渭川先生曩宰吾邑政通而民和治勤而訟理未朞年闔境大治邑之人交口頌之今去官迄數稔矣歸自其鄉以所著施州考古錄見示蓋曩歲聽政之餘所手輯以備掌故者余不學懵於鄉土故實媿無以進一詞然以先生博聞彊識考訂之勤其於施州志乘刊謬正訛搜殘補缺有以信今而傳後爲他日續修縣志之先資誠斷然者且坐對一編烽火家山惻惻動念覺先生仁民愛物不忘所治之情猶髣髴流露於鉛槧簡牘間至於去官旣久不能已則信乎先生真能親民者也而施人之思先生亦與此錄以俱永矣

治民饒鳳璪謹識

施州考古錄叙言（此書原名施州訪古錄滌齋定爲考古因從之）

恩施古施州也施州烏乎名隋志稱後周元和志云始周武帝建德之三年蓋宇文氏平定桓氏之亂因施王城之名名之也施州之前事著在歷史者若廩君若竹王其軼時見於他說類皆齊諧志怪之談僅可目之爲神話時代無他地處遐荒傳聞失實紀載易譌欲求信史寥寥其難顧或謂楚之檣杪其義竊取於春秋春秋用夷禮則夷之然而陳良楚產亦思用夏變夷綱常名教之扶持此中大有人在在周有巴蔓在漢有尹珍忠愛遺徽風斯遠矣下逮唐宋日趨開明夫清江山水烟霞之窟也况有夜郎之古道出其間高人畸士之所栖息金石文字尙可蒐求又安得以蠻花犵鳥之鄉鄙而弗論耶禧自去冬十月奉檄來施兵刑錢穀罷勞精神其於考古徵文徒懸心目書生積習愧未能除無幾得郡縣志乘而讀之興與古會惜其書多殘闕偶滋疑義輒援往籍附以管見披而存之信筆所至都無體例稍獲公暇手自鈔錄哀訂兩冊適 內部下修志之令既取其舊者葺而補之刊成完本復徵集當地碩學之彥賡續纂新乃出斯稟就正之客中乏書采證罅漏叢多宏達如 諸君子

施州考古錄

叙言

三二

尙期糾繆繩愆以匡不逮庶幾隨 諸君子之後或留爲敝帚之一助云

中華共和建國之六年九月恩施縣知事鄭永禧謹識

施州考古錄上卷目次

恩施縣沿革大綱

清江源流

施州形勢

施通蜀道

施爲古夜郎地

廩君石穴

巴蔓子墓

竹王祠故址

尹珍遺蹟在珍州

吳晉兩建平郡

沙渠爲施始置之縣

施州考古錄

上卷目次

信陵故城

南陵廢縣

施王屯餘址

鹽水清江同時並置

改烏飛爲開夷縣

清江清化之更名

柳州城

今知事署本舊府署

恩施八景（一作施州八景）

施州考古錄上卷

三衢鄭永禧渭川手訂

恩施縣沿革大綱

恩施縣志導源於施州舊志其地理志所載歷代沿革多漏略且前後抑復參互茲爲攷正重編如下

禹貢荆梁二州地（本荆州域因梁州下有和夷底績語晁氏謂夷水出巴郡即此）職方爾雅屬荆州春秋屬巴國境戰國屬楚巫郡秦屬黔中郡（方輿紀要作南郡）隸荆州漢爲荆州南郡巫縣南境（前漢地理志巫下有夷水東至夷道入江可證）建安十三年七月曹操平荆州以南郡西部爲臨江郡十五年劉備領荆州牧改臨江爲宜都郡（宋書州郡志引習鑿齒太康地志以爲吳立）己亥二十四年十一月孫權取荆州宜都屬焉吳永安三年七月分宜都西境置建平郡於秭歸（是時晉先立建平郡治夔州之巫山）始立沙渠縣晉太康元年三月平吳兩建平併合沙渠仍舊晉建平領有建始縣江左分立南陵縣（並見宋志）今縣東百里有南陵渡（即南里渡）或其故境晉末桓誕據此築城臨施水號施王

施州考古錄

上卷

城即縣南十五里施王屯（俗稱蠻札營）子孫襲王至後周始滅宋永初後南陵建始俱廢惟沙渠獨存齊及梁陳均因之沙渠還屬建平郡（齊州郡與宋同梁陳不志州郡據元和志吳分立沙渠縣至梁陳不改其仍舊可知然考魏書有桓誕降魏事疑此時已在魏屬下故後周得而平之）後周武帝保定初平施王桓氏之亂建德二年始於此置施州（見元和志施州之名始此）及清江郡分沙渠設烏飛鹽水二縣（見隋志）以烏飛屬施州置亭州（以州有都亭山名同時又有麻城之亭州見隋志永安郡）並置資田郡於鹽水縣（明統志言故城在城東四十里）是時爲三縣地兼兩州郡治隋開皇三年廢兩郡改烏飛爲開夷縣（方輿紀要在衛北六十里）五年改沙渠爲清江縣隸荆州總管大業初廢施州改亭州爲庸州三年州廢復置清江郡領清江鹽水開夷（合巴山建始爲五縣）義寧二年（此依舊唐古蹟志誤九年按義寧爲恭帝侑僅一載無九年新唐作元年九係元誤）置施州（元和志義寧二年復置郡）領清江開夷二縣唐初武德二年（即義寧後一年）置江州（見新唐宜都下本後周立隋廢改置隸山南道峽州舊唐置廢皆在四年）領鹽水縣（尙

有巴山共二縣）四年置睦州八年州廢省鹽水（見新唐以巴山隸東松州天寶八載省入長陽）麟德元年廢開夷縣入清江（新舊唐書同府縣志均誤武德元年）開元中施州領清江（及建始縣）隸江南道（後分西道）黔州觀察使（後爲都督府）天寶元年更名清化郡（通典或爲清江郡不更名）乾元元年復爲施州天復元年王建取施州三年建爵蜀王遂有其地五代梁開平元年四月施州屬梁九月入前蜀後唐同光三年十一月屬唐應順元年又入後蜀歷晉漢周皆同（五代史職方考）宋興乾德三年正月平蜀（宋史太祖本紀蜀王孟昶降得四十五縣）施州屬宋稱清江郡軍事仍領清江縣並取夜郎故地入施州（宋史地理志清江縣有歌羅永寧細沙甯邊尖木夷平六砦皆夜郎故地元豐九域志作歌羅細沙寧邊小大木夷平行廓安確七寨誤尖木爲小大木尖木砦本丁謂置在城北歌羅細沙均在宣恩境）七月珍州刺史田景遷內附（見太祖本紀）置羈縻珍州於清江南境（今宣恩有珍山古蹟卽其地按宋史地理志大觀二年大駱解上下族帥獻其地復建珍州恐另是一事）開寶元年改爲高州後改西高州州北偏在今縣南境（廢高羅

施州考古錄

上卷

一一

土司故地）至道三年（分天下爲十五路）施州隸峽州路咸平六年（一云天聖間分十八路）析峽西爲夔州路元豐三年（分二十三路）隸夔州路都督府（按寰宇記峽夔二州並屬山南東道施州屬江南西道其書出自宋初猶循唐制）元至元十三年平宋廢郡立省施州仍舊領清江縣隸四川行中書省夔州路總管府（元史地理志在至元十五年本紀作二十五年）二十二年併清江縣入施州廢西高州置沿邊溪峒招討司至正二年更爲施南道宣慰使司（施南之名始此）十七年爲僞夏明玉珍所據改施南宣撫司（道光間有南鄉農民獲二銅印大者博二寸餘文施南萬戶府背鐫大夏天統三年小者博二寸文施南宣撫司司獄司按卽明氏僞印元有萬戶總管府明氏習稱之天統其僞號也三年乙巳係至正二十五年）明洪武初明昇（玉珍子）廢施州四年六月明昇降因之十四年五月復置施州屬四川夔州府六月兼置施州衛軍民指揮使司屬四川都司十二月改屬湖廣都司（施隸湖廣始此）後廢州存衛領所一宣撫司四安撫司九長官司十三蠻夷官司五當洪武四年元施南道宣慰使覃大勝兄弟入朝納元所授金虎符命以施州宣慰

司爲從三品長官爲正六品招覃大富署施南長官司七年升宣撫永樂二年（或作三年）五月改置施南長官司屬大田軍民千戶所四年三月復升宣撫仍屬施州衛（施南宣撫故地在今宣恩境大田今咸豐縣治）弘治間忠孝忠路二土司私徙於施州都亭里滿清入關何騰蛟督師駐施爲恢復江豫楚蜀兼雲貴軍務奉永歷年號（有關廟碑可證）康熙三年施始歸順廢指揮千百戶設流衛十三年吳三桂據滇稱帝國號周施爲所屬十七年三桂死十九年僞將李春儒率衆投誠施乃屬清雍正六年廢衛題改恩施縣（恩施縣名始此）七年設官領原管十五土司隸巡荆道歸州直隸州十年東鄉土司改流地入恩施縣十一年忠建土司改流地入恩施縣十二年忠孝土司歸誠地入恩施縣十三年撥忠孝土司地入利川縣忠建東鄉二土司地入宣恩縣置施南府領恩施宣恩咸豐來鳳利川建始六縣（建始一縣由夔割還）乾隆元年設官定制隸湖北布政使司巡荆道恩施乃爲施南六屬之首治光緒三十一年設施鶴兵備道駐恩施城中華民國元年鄂省起義廢道府廳州存縣設知事直隸都督仍稱恩施縣三年設鄂西觀察使駐宜昌四年改荆南道道尹

施州考古錄

上卷

三

施屬隸焉如今制統轄於湖北省長治下（本民政長改巡按使上年改稱省長）

按施在前代或州或郡或縣其疆域殊難分晰唐宋以後半淪於夷族有明一代全在土司之掌握逮清中葉始克改土歸流設官定制蓋亦見蟬蛻之有由來矣茲采摭史志所載證以別錄凡有關於恩施一邑之境土者列之此外概行從略亦曰名從主人之意也

清江源流

志於清江源流叙之詳矣然語不一致細分之有三說一云清江一名夷水考元和郡縣志隋開皇五年置清江縣屬施州在清江之西因以爲名清江一名夷水昔虞君浮土舟於夷水卽此禹貢和夷底績晁氏曰夷水出巴郡魚復縣東南過佷山縣南（今長陽境）又東過夷道縣北（今宜都境）東入於江前漢地理志南郡夷道縣應劭曰夷水出巫（卽巫山縣）東入江明史地理志施州衛東北有清江一名夷水下流至宜都入於大江今以地勢求之建始（本漢巫縣南境與恩施同）東北大岳嶺下蒲潭溪正當巫山西南奉節（古魚復縣）東南而恩施東北也此屬清江北道水發源當在蒲潭溪一云清江一名鹽水後漢南蠻傳

注施州清江縣水一名鹽水源出清江縣西都亭山明史地理志施州衛北有都亭山府志都亭山在恩施城西北二百里距利川東九十里爲恩利交界其下卽都亭里雪照河出其間過此並無伏流此屬清江西道水發源當在雪照河一云清江一名黔江明史地理志又云清江自四川黔江縣流入亦曰黔江衛境諸水皆入焉考清江秦屬黔中郡唐亦屬黔中道與黔江連界有鸞到溝距黔江縣頗近經咸豐宣恩二縣入施此屬清江南道水發源當在鸞到溝綜上三說西道水爲正自利川來流至兩河口可通小舟會鹽水溪繞恩施縣城東而過南道水納黔江下流自咸宜來至忠建河（去縣東百二十里）入清江北道水自建始來爲龍駒河（恩建交界）至南里渡入清江循夷陵故道曲折東流而下此三道水皆匯合於施境支流所在多有之不勝備誌志載不免差謬當依今地理重爲考正附記於下

附清江源流道里記（此由施人周君鯤齋實測詳誌另繪有圖）

清江源出利川縣西百四十里之小山東東流十里過白楊塘南入於檀香洞伏流四十里至七藥山東龍洞溝始出東南流十里北會大魚泉水又五里西會爛井壩水又十里

施州考古錄

上卷

四

逕石梁河東會觀音河水又十里逕抱龍橋東折北流十里至白龍灘又北流十里過白果壩東又東西南北環繞十里爲太極水又東流十里過涼霧山北又南折東流十里至兩會塘南會繼長壩水又東折北流十里逕散水又北流十里過三渡峽又北折東流十里再折南流十里遠下養村西又南流二十里過蔓坡西至利川縣治西南會九渡河水又東流十里至利川縣治南北會崑洞灣龍洞坳水又東流十里至利川縣治東之兩會灘南會忠孝水又北流二十里入於落水洞伏流一里至鱸魚洞又伏流五里至響水洞又伏流十里至觀彩峽又伏流十里突於黑洞復出爲雪照河南會高橋水東南流十五里遠都亭山西又東南流十五里逕黃連溪遠都亭山南交恩施縣境東南流十四里過木撫村南北會流料溪水東流六里至兩河口南會天鵝塘水（至此可通舟楫行至縣治東南十四里之伏三跳）又東北流十五里逕龍王潭過屯堡場北至香爐灘北會落葉壩水又東北流三里至土地灘北會三龍溪水又東北流三里至捨命灘又北東流四里南會拖泥溪水又東流四里至大冲潭灘又東南流半里南會鴨松溪水又東南流半

里至野猪灘又五里過三簸箕灘又二里至木魚灘又入峽東南流四里逕大龍潭至明城南北會帶河水又東南流七里北會丫福山水又東南流六里過余家灘至三篙子灘南會鹽水溪水又東流三里北會蟠龍溪水又東南流二里至擂鼓灘又南流五里至恩施縣城北遠東東會通潮溪水又西南流一里半至恩施縣城南西會藥水麒麟二溪水又南流半里至新灘（此灘係本年四月間南岸崩裂壅成）又東南流二里半東會鐵溝水又南流五里至伏三跳灘（前清光緒二十五年恩施知縣黃世崇曾募民夫開挖後復淤塞灘下可通舟至長沙河）又南流五里過天成山東西會天橋河水又南流五里至鳴溪渡又五里過舊州城南至石板灘南會金銀溪水又東流五里至長沙河又東少南流二里至羅家洞灘（前經開挖）入峽東南流四里逕蓮花三灘（前經開挖）至竹壩河又東流五里南會忠建河水為萍冰河又東流二里為石心河又北流八里為風水河又東北流四里至沙子地南為銀潭河北會馬水河水出建始境由南里渡北流注之又東流九里逕龜山河灘過紅花壩灘至龍洞灣灘（上三灘亦經黃前縣開過）又東南流

施州考古錄

上卷

五

十里為大忠建河遠玉峯山南至滾波浪灘（此灘係明弘治三年二月南岸山裂大石塞江遂壅為灘黃前縣募開將通）又東流五里逕馬樑石過三簸箕射拱挖灘（上五灘亦將開通下可行舟）入峽東北流十里至兩河口南會紅蘭溪水又十五里至七里灘北會麥子壩水南會繁葉屯水又四里至下札坡北會邊欄水東流四里又入峽東流五里至雷打石灘東南流十三里西會金龍壩水五里至魚劍灘八里清明灘（至此搬灘）又東北流十五里至亂吼灘繞舊施州塘汛地下眠羊口（山極險峻上屬恩施）交建始界其南岸為雙土地（其地仍屬恩施插花入建境）王公渠水自北而出東流五里入景陽河五里鱧魚灘（至此搬灘）過關口崖五里清江堡五里至田峽口（可通貨船）伍家河水出焉東流十里北會野山河出口（名野山口）交巴東縣界又東北流十里會鴉公水合支洞河併流而下二里至苦力灘二里將軍石灘八里經四家河馬房溪水自北注之過馬嶺頭十里下桃符口（有小村落）龍窠水自南注之下二里為磨刀灘（水勢極險貨客上步）五里魚腥灘十里白蛇灘六里逕小溪口龍潭溪水自北注之五里

過鑼鼓溪五里至南灘四里朱梁灘二里青灘五里魚龍灘八里至界牌石五里長灘又一里過九灣沱（有村名汪家嘴）交長陽縣界四里至鹽池（有溫泉浴之可治瘡）五里過牛皮灘（水勢頗急）十里至招徠河（有市場至此河身頓窄以下皆山峽須水洪可行若水枯則多阻滯）巴東四渡河水自北出焉四里王皮灘三里挺子灘（皆急流不便舟楫）五里至雙石子四楊溪（卽二叉溪）水自南出焉五里巖松坪二里大花坪五里至魚峽口沙河水自南出焉其峽口爲巴王沱下爲鱧魚灘五里簸鎖灘十里旱蜂子灘五里沙灘二里青灘又五里連三灘八里至天池口天池水自南出焉三里太平灘十里長安寺灘桃山水自北出焉五里花灘六里蹇窩灘四里至向王灘（水極險惡）有向王溪自北出口繞資坵市而下卽資坵河（小舟至此可換大舟入江）東流三里爲山崖河又三里采桑坪有桃花灘帽子灘二里又一青灘二里獅灘十五里過巴山下（古巴山縣治）有巴山水北流而下南與重溪水會五里長灘三里狗牙灘十五里過馬連村三里靜安灘十里北會厚浪沱水爲厚浪沱灘五里至鴨子口南會古長楊溪水五里過

施州考古錄

上卷

六一

都圖灣五里周牙灘五里至綁子石灘（水險有名）十里至廟沱南有花溪水出焉其下五里亦鱧魚灘五里平樂灘平樂水由南出口三里過鹽市口又五里爲津洋口丹水北出津洋河下爲西市灘三里白魚灘又五里鯉魚灘三里有向王廟下爲鵝毛洞南會花橋水又五里南會馬家溪水其北岸卽長陽縣治三里金鼓灘西流溪及琵琶溪諸水自北匯流入焉十里至分水嶺交宜都縣界八里過朱津灘又五里斑魚灘五里至鄧家沱會南流溪水五里鄧家坡有柳金灘富金（亦作傅斬）溪水由宜昌來西南流入焉再南流十里過芭蕉灘又西南流過機謀洲（俗譌雞毛帚）有牛肚灘大花灘朱耳灘等灘西會人龍河水有龍頭灘逕毛家嘴五里繞石廠仍插入長陽縣境一角東流五里出劉家渡（屬宜都）又三里長灘五里葉家壩十里毛家沱十里南會漢洋河水自五峯縣漁洋關百餘里入境十里過宜都縣治入大江（周君原記頗有差訛予因出山親歷其地補正之）

右列清江道綫長凡一千餘里所過諸縣亦多富於天然物產者誠能以舟楫濟其不

通實乃生民無窮之利也湘陰黃公世崇由利川量移斯邑（黃公未任施令曾在府署撰有施南開河記刊載續府志）居施日久悉心經營乃程功數年費貲數千緡卒以虧於一簣戛然中止都人士莫不惜之自今能有繼志者乎急起直追竟前人未竟之業則莫大之幸予雖駑鈍願隨其後矣

施州形勢

地理志於形勢下載有一條云外蔽夔峽內遠溪山自巴蜀而瞰荆楚者恆以此爲出奇之道

按此語本出顧氏讀史方輿紀要顧其詞旨之主要者尙不僅此志載漏略不全豈當時有所顧忌歟茲補錄之云衛外蔽夔峽內繞溪山道至險阻蠻獠錯雜自巴蜀而瞰荆楚者恆以此爲出奇之道宋末蒙古塔海入蜀（元史有塔海帖木兒傳）荆湖帥孟珙（縣志誤作孟琪）遣兵屯施州以備之又蒙古兵渡萬州（今四川萬縣）湖灘施夔震動蓋施夔表裏大江而清江源出彭水（今考清江源出雪照河志云雪照河在城西源出彭

施州考古錄

上卷

七

水縣至兩河口入清江然其遠源多是伏流不可分晰姑仍依其說）中貫衛境（由西南入境具詳清江源流下）至夷陵（今宜昌）宜都而合大江其取逕尤捷也明隆慶五年湖廣撫臣言荊州去施州道里險阻不便巡歷夷陵以西有明初穎國公傅友德所關取蜀故道名百里荒者抵衛僅五百餘里請移巴東之石柱巡司於野三關（在衛東北四百里）施州衛之州門驛於河水鋪（在衛東北三百餘里）三會驛於古夷鋪（在衛東北二百餘里）俾閭井聯絡而於百里荒及東北隴仍創建哨堡各令千戶一員督夷陵長寧二所（長寧所設於歸州治東）班軍各百人更番戍守庶無險遠之慮此亦平時效籌者所當知也

據顧氏所言則出奇之道以百里荒最爲險要考之明史廖永忠伐明玉珍（據成都稱夏改元天統施地亦爲所有）別將由長陽巴東境所云百里荒者潛出夔門之上游卽指此也

施通蜀道

疆域志一東之迤北自蓮花池二十五里至丫沐峪由此十八里至一桶水由此七里至響板溪（村集下云東鄉有三里荒距丫沐峪九里距縣五十四里今廢響板溪在三里荒之前十六里距縣七十里此屬東大路今行人已少）由此十五里至南里渡由此十五里至鴉鵲水由此七里至滾龍壩由此十五里至崔家壩由此七里至石梯子交建始界一北之迤西自縣城二十里至方家壩由此十里至豬圈門（向北往屯堡上板橋抵四川奉節界又旁通馬砦木貢木撫等處）又由豬圈門（西行）二十五里至黃草坡由此十里至沙子門由此十五里至羅針田由此十里至梨兒坡交利川石板頂界續府志恩施縣東路自北城外至百步梯（卽石梯子）建始界百二十有八里西路自北城外至石板頂利川界百四十里計東西石路共二萬三千四百三十三丈內石梯二萬七千零四十一級沙土路二千九百八十九丈廣六七尺不等光緒四年知府王庭楨督修存錢一千貫發商生息以備歲修

按此係通宜昌下省之大道自昔已然如舊州城宋刊秦將軍西瓜碑有蓮花池接客亭

施州考古錄

上卷

八

之設及嘉慶間茹古香學使（名棻）亦有過蓮花池詩率皆取道於東近始改而向北王子泉太守之所修治者卽舍彼就此蓋古之所謂蜀道難者相傳卽指此道而言由此達利川向萬縣道皆奇險以施地之所經者考之自崔家壩直抵箕星嶺（亦稱雞心籠）至十字路（距箕星嶺十里）折而西向出小龍潭（距城二十里）轉朱圈門上羅鍼田抵利川之團堡寺大道通計二百四十里（中省小龍潭進城一段）兩路橫度之大略也

節錄王太守恩施縣屬修路記

昔讀李白詩云蜀道之難難於上青天以爲言蜀中耳今乃知施南向隸夔州故蜀道也考施南卽古夜郎地漢武時發巴蜀廣漢三郡士卒治夜郎之塗士卒罷勞三年而功不竟施南道固若是難治哉歲丁丑庭楨來守是郡辭於制府合肥李公公爲言宜昌施南二郡路難行而施尤甚曩年奉命入蜀經此心悸因以憫諸行役者庭楨請治之制府以爲難者再蓋難於工之鉅亦難於費之繁也旣之官道出宜昌以分修與宜守約宜守有難色比入山過長陽巴東爲施南境施屬建始路尙平恩施則由鴉雀水而南里渡雙樹

門戴家店楠木坡熊家巖饒家灣箕星嶺黃魚泉皆奇險也歷詢而手識之蒞郡後以治道告郡中人士有力者皆懼忻請出貲不數月得錢五千餘貫乃以興修請於制府維時庭楨亦知其難而不敢以難阻也於是親率董事督役夫險者夷之曲者直之狹者廣之闕者補之或改南爲北改東爲西或鑿高爲低移遠爲近斬荆棘置橋梁循途濬溝臨壑種樹期年而東道成建始亦興工制府聞之蓋喜甚獨是奮於初者每難爲繼得其半者必圖其全今東道已成而入蜀之西道闕如猶未遂制府之志也爰與郡人士暨利川商治西道已而制府出白金三千以千五百金助宜昌以五百金助施之利川建始以千金助恩施庭楨亦以俸錢八百貫濟恩施用郡人士益奮然曰官斯土者尙如此吾儕生長其地顧不問耶恩施西道若太陽坡大龍潭朱圈門新開路麻園黃草坡猴子巖沙子門羅針田頭磴巖石子路麥田灣以至利川界之石板頂其難治過東路數倍黃紳炳文劉紳肇修康紳文煥立昇等自願出貲兼勸商民共輸之又得錢四千餘貫刻日興工一如東路布置越十五日而畢制府聞郡人士之樂輸製惠達康莊頌以旌其閭謂能分任其

施州考古錄

上卷

九

難也當工作時有謂庭楨不必親其勞者庭楨應之曰昔武鄉侯有言恐他人不似我盡心此大難事倘功不實而有濫費何以對制府與郡中諸君子乎久之建始利川均由庭楨督修告竣而宜昌屬之長陽巴東治亦完善工不虛糜民皆樂助由施而蜀周道如砥庶克成制府之志歟嗟乎山川邱陵地之險也而施南之險則最著當夫人行萬山中身出林表雲生馬頭上有矗起之懸崖下有陡絕之深谷羊腸一線纔通往來亂石礮礮夾道蹲伏抑不知夫負戴之行人懋遷之商賈與夫筋力衰頹跛躄婦孺由斯道而心驚膽落當復何如今則上有石梯下無泥淖不三年而難於上青天者皆易如履平地視漢之治夜郎其功之遲速有間矣(下略)

施爲古夜郎地

相傳有施爲古夜郎之說志無可據明李一鳳(衛孝廉)作夜郎辨清李宗汾(府庠訓)陳詩(未詳)羅德崑(府庠訓)並有施非夜郎考與辨見藝文志(今府志本李孝廉舊衛志稿前清李羅兩廣文先後續修故各著其說)祠廟志有竹王祠云漢封夜郎王其子爲夜

耶侯言漢夜郎者以此證 古蹟志有問月亭云李白流夜郎於此把酒問月言唐夜郎者以此證

按前漢西南夷傳云南夷君長以十數夜郎最大師古曰後爲縣屬牂柯郡此夜郎之名之見於史者語本史記然史公只言莊蹻略巴黔王滇不云伐夜郎華陽國志乃云周之季世楚威王（後漢書作頃襄王）遣將軍莊蹻泝沅水出且蘭以伐夜郎植牂柯繫船於是且蘭既克夜郎又降而秦奪楚黔中地無路得反遂留王滇池以繫船因名且蘭爲牂柯國分侯支黨傳數百年以此推之所謂夜郎旁小邑如且蘭等始皆服屬於夜郎者轉而向滇觀後滇王接見漢使猶有孰與我大之問斯亦夜郎自大之氣概也然常志亦只夜郎降之不云卽滅范書誤會師古注前志遂援以改常氏此文使夜郎果滅漢又安得而侯之王之乎牂柯本繫船牻水經注謂牂柯江中兩山（異物志有一山在海內小似繫船筏俗人謂之越王牂柯遠望甚小而高不似山近望之以爲一株柏樹在水內又交州記侯石孤絕高數丈名爲牂柯在海中酈氏之言殆亦類是）證以管子小匡牂柯又

施州考古錄

上卷

十一

爲南夷之古國與吳越荆巴等不因莊蹻而始名之也茲姑勿論就牂柯江而言牂柯江一名烏江在黔中其發源處有出自施屬邊際者（如瑪瑙河黑峒河皆是去城西南二三百里）逕黔彭西陽而下會諸水入江實包有古夜郎區域夜郎自漢武帝元鼎六年置縣屬牂柯郡迄晉懷帝永嘉二年分牂柯立夜郎郡五年立夜郎太守領夜郎等四縣唐始以隋之牂柯置郎州後改播州（今遵義）復三置夜郎縣並屬黔中郡都督府理彭水縣施州亦隸治下武德四年析夷州之寧夷置夜郎縣此一夜郎也貞觀元年州廢縣亦省貞觀八年分辰州之龍標置夜郎縣（本巫州改沅州又分置舞州）又一夜郎也天寶元年改峨山惟貞觀十六年（通典作七年十道志作十七年）開山洞置珍州之夜郎縣最久後爲夜郎郡元和三年廢珍州而夜郎屬溱州其爲縣也如故據元和郡縣志珍州夜郎下本徼外蠻夷之地東南至播州西接夷獠界北至溱州（下巴郡南境）夜郎縣郭下麗皋樂源在州側近或十里或二十里隨所畚種田處轉移不常厥所此可見當時夜郎人民曾無一定之棲止矣隨山開洞或徙而東或徙而西又或逐水草而居始自牂

柯繼而蔓衍黔彭諸境距施尤近施州圖經南入牂柯之夜郎通志言施州形勝遠控夜郎明牂柯在施州之南而與夜郎實有控制之勢也其大部落全在黔中元和志施州南至黔州四百八十五里（元豐志二百五十九里）其爲同域接壤可知已通鑑漢武帝紀注李文子曰寰宇記唐播夷等州卽秦夜郎之西北隅今珍州亦其地又西高州有夜郎縣牂州建安縣（唐屬羈縻地亦在今遵義）有古夜郎城西近施黔東近辰沅皆其境也漢之夜郎大略如是珍州夜郎郡唐末沒於夷宋史諸蠻傳太祖乾德三年珍州蠻酋田景遷（一作景千亦作田仙玉海作田景平）以其地內附賜名珍州開寶元年乞改西高州仍名夜郎郡領夜郎等縣珍州以珍山名西高州故境在今宣恩縣高羅里當施州之南（元設施南宣慰司於此）地有珍山並有李溪相傳李白流夜郎時居此楊升菴謂高羅卽歌羅太平寰宇記補闕（桂林陳氏本）於施州清江縣載有歌羅砦在縣西南（舊府志云在恩施縣南）方輿勝覽本夜郎故地唐置珍州乾德四年（與宋史差誤一年）蠻酋珍州刺史田景遷內附納土以西江爲界自是西江以北夜郎縣故地盡入施

施州考古錄

上卷

十一

州就此一證施南之南境緊接黔彭西陽明明其爲夜郎故地也何必遠尋牂柯而後謂漢之夜郎在是乎又安知唐之夜郎必異於漢之夜郎之所在乎紛紛之辨徒爲辭費而已竹王祠問月亭當別爲之說

廩君石穴

沿革志引後漢書南蠻列傳巴郡南郡蠻本有五姓巴氏樊氏覃（范書原作覃音審如春秋狼臆之臆今民多覃姓讀如秦通志氏族略覃本譚或去言爲覃）氏相（相姓今罕見疑卽向姓漢有向述稱向王）氏鄭氏皆出於武落鍾離山（原注代本日廩君之先故出巫誕也按代本卽卅本唐避諱改誕當作筮）其山有赤黑二穴巴氏之子生於赤穴四姓之子皆生黑穴未有君長俱事鬼神乃共擲劍於石穴約能中者奉以爲君巴氏子務相（縣志誤作先依府志正）乃獨中之衆皆歎（志衍服字）又令各乘土船約能浮者當以爲君餘姓（志脫姓字）悉沈唯務相獨浮因共立之是爲廩君乃乘土船從夷水至鹽陽（原注荊州圖曰副夷縣西有溫泉古老相傳此泉原出鹽於今水有鹽氣縣西一獨山有石穴有二